

## **Governu aprova Proposta Lei OJE 2022 biliaun \$1,675**



Primeiru-Ministru, Taur Matan Ruak, prezide reuniaun Konsellu Ministru, iha Palásiu Governu, segunda (06/10). Imajen TATOLI/Francisco Sony

**DILI, 06 outubru 2021 (TATOLI)**—Governu liuhosi reuniaun Konsellu Ministru (KM), iha kuarta ne'e aprova Projetu Proposta Lei Orsamentu Jerál Estadu (OJE) tinan 2022, ne'ebé apresenta hosi Ministru Finansa, Rui Augusto Gomes.

“OJE tinan 2022 ho montante biliaun \$1,675, kompostu hosi Orsamentu Administrasaun Sentrá, Orsamentu Rejiaun Administrativa Espesiál Oé-cusse Ambeno inklui Orsamentu Seguransa Sosiál nian,” Ministru Prezidénsia KM, Fidelis Manuel Leite Magalhães, relata hafoin reuniaun ezekutivu, iha Palásiu Governu.

Alokasaun orsamentu 2022 tuir prioridade nasional, a'as liu mak iha setór produtivu sira hanesan agrikultura no turizmu, ambiente no konektividade ho alokasaun 27%, tuir kedan ho abitasaun no inkluziun sosiál 22%, boa governasaun 12%, dezenvolvimentu kapitál umanu 10%, dezenvolvimentu rurál 3% no dezenvolvimentu setór privadu 0,5%.

Aleinde ne'e, ba funsionamentu mákina Estadu hetan alokasaun 18% no atividade seluk 8%.

OJE biliaun \$1,675 sei uza hodi finansia programa 43 iha perímetru OJE tinan 2022 liuhosi prioridade nasional neen hanesan, dezenvolvimentu kapitál umanu (edukasaun, formasaun profisionál no saúde), abitasaun no inkluziun sosiál, setór produtivu (agrikultura no turizmu), ambiente no konektividade, dezenvolvimentu setór privadu no kooperativa, dezenvolvimentu rurál, no boa governasaun, ho objetivu atu atinje dezenvolvimentu ida ne'ebé kualidade ho kresimentu ekonómiku ne'ebé inkluzivu no sustentável.

Alokasaun orsamentu aprova ba OJE 2022 tuir klasifikasaun ekonómiku a'as liu mak iha transférensia pública ho montante millaun \$565,9, tuir kedan ho bens no servisu millaun \$449,8, kapitál dezvoltimentu ne'ebé bele kria postu traballu no jere empregu rai-laran hetan alokasaun millaun \$401,7, saláriu no vensimentu millaun \$233 no kapitál menor millaun \$24,4.

Enkuantu, Governu sei prezenta Proposta Projetu Lei (PPL) ba Parlamentu Nasionál (PN) ha loron 15 fulan-outubru 2021, no ho aprovasaun ne'e, ba oin Ministériu Finansa sei hahú prepara Livru I to'o Livru VI inklui dokumentu adisionál sira.

Antes ne'e, OJE 2021 ne'ebé Parlamentu Nasionál aprova no Prezidente Repúblika promulga hamutuk biliaun \$1,895 kompostu hosi saláriu no vensimentu millaun \$239,26, bens no servisu millaun \$421,49, transferénsia pública millaun \$669,91, kapitál minor millaun \$61,14 no kapitál dezvoltimentu millaun \$503,20, ne'ebé iha marsu 2021, Governu prezenta proposta Orsamentu Retifikativu ho montante millaun \$223, nune'e sai biliaun \$2,1.

Hosi montante orsamentu millaun \$223 ne'e foti hosi Fundu Infraestrutura millaun \$60 no restu halo ajustamentu ba orsamentu 2021 ne'ebé aprova no promulgadu.

OJE 2020 ho montante biliaun \$1,497, fahe ba kategoria saláriu no vensimentu millaun \$206,8, bens no servisu millaun \$496,7, transferénsia pública millaun \$571,1, kapitál menor millaun \$8,9, kapitál dezvoltimentu millaun \$213,4.

Ho aprovasaun orsamentu 2020, Governu hakotu rejime duodesimál ne'ebé Governu hahú funksiona iha janeiru to'o outubru 2020 no orsamentu normal sei efetivu iha novembru no dezembru.

**Jornalista : Antónia Gusmão Editora : Julia Chatarina**